

G15-10-015

复办理江皖营务处与海防营务处前寿春镇台郭^[6]

光绪十五年十月十八日

善臣仁弟军门麾下：

顷接九月二十一日惠函，知前复一缄已登英睐，比审南陔日丽，北府风高，引企吉晖，式符臆祝。仲复中丞，前到金陵，屡得款叙，莅任之初，力求整顿，于军务、吏治，方切咨询。执事多年宿望，昔镇里闾，戎略民情，深知灼见，自宜加意延访，不同恒泛。旧部本是有名劲旅，兹复切属以认真操练，毋虚饷额，防营要道，不外此二端，但能实力奉行，自可保军声而挽颓习，前复仲帅函已切实谆致矣。江淮之间，连年灾侵，闻滨江各处早稻已有收成，米价尚不翔贵，而沿淮先被夏浸，受害独深。今岁江浙及湖北等处，本可望丰收，并以积雨受伤变为荒歉。邻壤并灾，接济不易，东南延望，曷胜隐忧。泐复，敬颂侍祺。惟照不具。愚兄。

G15-10-016

复潮州书院山长前詹事府少堂何^[6]

光绪十五年十月十九日

子峨仁弟馆丈大人阁下：

客冬一别，忽已经年。顷奉惠函，远劳拔饰。比审珂乡养誉，石室传经，汉代儒林之大师，教多闾里；吏部文章之旧地，望若斗山。补束生之陔兰，顾谢公之庭树。图史之暇，乐趣恒多，翘企吉晖，定符臆祝。令侄津门留滞，遂至多时，幼樵屡为言及，实以人浮于事，位置极难。昨复转属唐景星，令在矿局代筹一席，稍得薪贍，借资旅费，然恐所入有限，远纾家计必不易也。清恙闻已大愈，甚慰。专泐布复，敬颂侍祺，诸惟朗照。不具。馆愚兄。

G15-10-017

复两江制台曾^[6]

光绪十五年十月十九日

沅翁宫太保大公祖姻世叔大人爵前：

顷奉初十日惠函，知晦日泐上一缄，已达签览。冬寒渐厉，敬审柱躬康泰，式符臆祝。从子经藩，学殖浅薄，忝厕嘉招，奖饰逾恒，弥增悚愧。苏、浙同时大侵，苏属在将近成熟之际，尤为意外之灾，自不能拘定秋灾不过九月常例，使疾苦不得上闻，业经台端附片陈明，办赈尽有依据。前日甫读诏书，苏、浙各蒙恩发款